

有諷誦是經者善聽聞音聲者心中惻然衣
毛悉豎淚即爲出如是者其人皆當爲彌勒
佛作弟子得度世去

佛說兜調經

佛說意經

西晉三藏法師竺法護譯

聞如是一時婆伽婆在舍衛城祇樹給孤獨
園彼時有異比丘獨坐房中意作是念以何
故世間牽以何故受於苦以何故生已生已

人隨從於是彼比丘從下晡起起已往詣世
尊所到已禮世尊足却坐一面彼比丘却坐
一面已白世尊曰唯世尊我今日獨在房中
意生是念以何故世間牽以何故受於苦以
何故生已生已人隨從善哉善哉比丘有賢
道有賢觀善辯才所念善以何故世間牽以
何故受於苦以何故生已生已人隨從汝比
丘作如是問不唯然世尊此比丘以意故世
間牽以意故受於苦生意生意已人隨從比
丘而令世間牽受於苦生已生已人隨從此

比丘聖弟子無所著以彼牽以彼去彼生已
生已則隨從此比丘聖弟子阿羅漢能自御
意不自隨意善哉世尊彼比丘聞世尊所說
善樂善然可已重問世尊曰唯世尊言多聞
比丘言多聞比丘者唯世尊幾所故名多聞
比丘如來說幾比丘多聞善哉善哉比丘賢
道賢觀辯才所言善世尊多聞多聞比丘者
唯世尊幾所故名多聞比丘如來說幾是多
聞比丘汝比丘作是問不唯然世尊我多說
比丘契一歌二記三偈四所因五法句六譬

喻七所應八生九方等十未曾十一法說十二比
丘族姓子四句偈向我說者則知義知法應
法所行等與法俱如法行說如是比丘則是
多聞如是比丘為多聞如是如來說比丘多
聞善哉世尊彼比丘聞世尊所說善思惟念
善樂善然可已重問世尊曰唯世尊比丘聞
已比丘聞已智慧捷疾唯世尊所幾名為比
丘聞已名為捷疾智慧如來說幾比丘聞已
智慧捷疾善哉善哉比丘賢道賢觀辯才所
言善唯世尊比丘聞已比丘聞已智慧捷疾

世尊說幾比丘聞已智慧捷疾汝比丘聞此不唯然世尊此比丘彼比丘聞苦已以智慧知如真苦集苦盡苦盡住處此則爲聞彼以智慧知如真苦集苦盡苦盡住處此則爲聞彼以智慧知如真如是比丘彼比丘聞已智慧捷疾如來說比丘如是聞已智慧捷疾善哉世尊彼比丘聞世尊所說善樂善然可已重問世尊曰唯世尊比丘聰明辯才捷疾比丘聰明智慧捷疾者唯世尊幾所名爲比丘聰明智慧捷疾如來說幾比丘聰明智慧辯

才捷疾善哉善哉比丘賢道賢觀辯才所言善唯世尊比丘聰明智慧捷疾比丘聰明辯才捷疾者世尊說幾所名爲比丘聰明智慧辯才捷疾如來說幾比丘聰明智慧辯才捷疾汝比丘聞此不唯然世尊此比丘謂比丘亦不自念不念他不二念比丘但念意已自饒益及饒益他饒益多人愍世間故以義饒益天及人如是比丘聰明智慧捷疾如來說比丘聰明辯才智慧捷疾善哉世尊彼比丘聞世尊所說善思惟念受持誦讀已從坐起

禮世尊足遶世尊離世尊還彼世尊以此喻
為說之獨在靜處不亂志寂靜住彼獨在靜
處不亂志寂靜住已謂族姓子所為剃鬚髮
已被著袈裟信樂出家棄家學道修無上行
梵行見法成神通作證住生已盡梵行已成
所作已辦名色已有知如真彼尊者已知法
至成阿羅漢佛如是說彼比丘聞世尊所說
歡喜而樂

佛說意經

佛說應法經

西晉三藏竺法護譯

聞如是一時婆伽婆在拘類法治處彼時佛
告諸比丘謂今此世間如是婬如是欲如是
愛如是樂如是喜但不愛不念法敗壞愛法
念增彼如是婬如是欲如是愛如是樂如是
喜而今今不善法轉增愛善法轉減我法甚
深難見難覺難了難知如是我法甚深難見
難覺難了難知而今今不愛善法減愛善法
增與此四法相應世間有此云何為四有與